



Introdusaun

Iha Jullu 2014, Unidade Justisa ba Feto no Labarik (*Women's and Child Justice Unit- WCJU*) kontinua monitoriza kazu violénsia bazeia ba jéneru iha jurisdisaun Tribunál Distritál Dili.

Iha edisaun ne'e, sumariza kazu 26 ne'ebé julga iha Tribunál Distritál Dili.

Husi kazu 26 ne'e, kazu 25 klasifikadu nu'udar krime ofensa ba integridade fízika simples ho natureza violénsia doméstika no kazu 1 involve krime violasaun seksuál. Entre kazu hirak ne'e, kazu 5 mak tribunál kondena ho pena multa, kazu 9 kondena ho pena prizaun maibé nia ezekusaun suspendidu, kazu 1 omologa, kazu 3 absolve, no kazu 8 seluk sei iha prosesu nia laran.

Tuir mai deskripsaun sumáriu julgamentu ba kazu kompletu:

1. Krime ofensa ba integridade fízika simples ho natureza violénsia doméstika - Nú. Prosesu : 286/14.TDDIL

Kompozisaun Tribunál	: Juis singular
Juis	: Dra. Jumiaty Freitas
Ministériu Públiku	: Dr. Hipolito Martins Santa
Defeza	: Dra. Marcia Sarmiento (defensória públiku)
Konkluzau	: Kondena ho pena multa

Iha 2 Jullu 2014, Tribunál Distritál Dili julga arguidu IFP ne'ebé komete krime violénsia doméstika hasoru nia feen, iha Distritu Dili.

Ministériu públiku akuza katak iha 4 Janeiru 2013, arguidu tuku dala ida iha lezada nia tilun-hun no dudu lezada monu ba rai. Aktu ne'e rezulta lezada sente moras iha tilun-hun. Motivu husi akontesimentu ne'e tanbá lezada la prepara han meudia ba arguidu.

Ministériu públiku akuza arguidu kontra artigu 145 Kódigu Penál konabá krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa faktus sira iha akuzasaun, deklara katak nia arepende ninia hahalok no promote katak sei la repete krime hasoru lezada iha futuru. Aleinde ne'e, lezada kontinua reforsa akuzasaun husi ministériu públiku no deklara katak durante sira moris hamutuk arguidu sempre halo problema hela deit ho lezada.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian no konfirmasaun husi lezada. Bazeia ba faktu sira ne'e, husu ba tribunál atu kondena arguidu ho pena suspensaun.

Defeza husu ba tribunál atu konsidera sirkunstansia atenuante jerál arguidu nian no husu pena ne'ebé justu.

Kazu ne'e konklui iha 15 Jullu 2014, no tribunál kondena arguidu ho pena multa US\$60.00 no selu kusta judisiáriu US\$ 10.00 tanbá tribunál deskobre katak arguidu provadu komete krime iha natureza violénsia doméstika hasoru lezada. Tribunal mos fiksa pena alternativu loron 40 prizaun kuandu arguidu la kumpri pena multa.

2. Krime ofensa ba integridade física simples ho natureza violénsia doméstika-Nú. Prosesu: 338/14.TDDIL

Kompozisaun Tribunál	: Juis singular
Juis	: Dra. Zulmira da Silva
Ministériu Públiku	: Dra. Ivonia Maria Guterres
Defeza	: Dr. Sebastião Amado (defensória públiku)
Konkluzau	: Sei kontinua prosesu

Iha 2 Jullu 2014, Tribunál Distritál Dili, julga arguidu FEMF ne'ebé komete krime violénsia doméstika hasoru nia feen, iha Distritu Dili.

Ministériu públiku akuza katak iha 13 Jullu 2013, arguidu hodi bibiron tuda iha lezada nia ulun no tuku dala ida iha tilun-hun no rezulta lezada sofre moras iha ulun no tilun-hun. Problema ne'e akontese tanbá lezada haruka arguidu atu halo susu ben ba sira nia oan atu hemu maibe arguidu lakohi, tanba ne'e mak sira diskuti malu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Iha tribunál, arguidu konfesa no deklara katak faktus sira iha akuzasaun loos hotu, arepende ninia hahalok no di'ak malu ona ho lezada.

Tanbá arguidu konfesa faktus sira iha akuzasaun integralmente, ministériu públiku aseita atu la rona tan depoimentu lezada no kontinua ba alegasaun.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian, deklarasaun arependidu no diak malu ona ho lezada. Tanba ne'e husu ba tribunál atu kondena arguidu ho pena prizaun fulan 6 suspende ba tinan 1. Defeza iha nia konkluzau husu ba tribunál atu aplika pena multa.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 15 Jullu 2014 iha tuku 14:00 loraik.

3. Krime ofensa ba integridade fízika simples ho natureza violénsia doméstika-Nú. Prosesu: 165/14.TDDIL

Kompozisaun Tribunál : Juis singular
Juis : Dr. Julio Gantes
Ministériu Públiku : Dra. Ivonia Maria Guterres
Defeza : Dr. Manuel Exposto (defensória pública)
Konkluzau : Kondena ho pena multa

Iha 2 Jullu 2014, Tribunál Distritál Dili prejide leitura sentensa ba kazu violénsia doméstika ne'ebé komete husi arguidu CM hasoru nia feen, iha Distritu Dili.

Ministériu públiku akuza katak iha 11 Janeiru 2011, arguidu tuku dala ida iha lezada nia ulun no tebe dala rua iha hirus matan tanbá lezada la hatama ropa ne'ebé habai hela iha liur.

Ministériu Públiku akuza arguidu kontra artigu 145 Kódigu Penál konjuga ho artigu 35 Lei Kontra Violénsia Doméstika.

Bazeia ba prosesu ne'ebé lao tiha ona antes, tribunál konklui prosesu ne'e no kondena arguidu ho pena multa US\$90.00. Tribunál mós fiksa pena alternativa loron 60 prizaun kuandu arguidu la kumpri pena multa ne'e, selu mós kustas judisiáriu US\$20.00.

4. Krime ofensa ba integridade fízika simples ho natureza violénsia doméstika - Nú. Prosesu: 216/14. TDDIL

Kompozisaun Tribunál : Juis singular
Juis : Dra. Zulmira da Silva
Ministériu Públiku : Dr. Matias Soares
Defeza : Dra. Olga Nunes (defensória pública)
Konkluzau : Sei kontinua prosesu

Iha 7 Jullu 2014, Tribunál Distritál Dili hala'o julgamentu ba arguida LS ne'ebé komete krime violénsia doméstika hasoru nia oan, iha Distritu Dili.

Ministériu Públiku akuza katak iha 7 Jullu 2012, arguida baku lezada nia liman no ain ho sasuit, ne'ebe kauza lezada sofre moras iha liman no ain. Kazu ne'e akontese tanba lezada tolok nia avó.

Ministériu públiku akuza arguida kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguida deklara katak nia baku duni lezada ho sasuit tanbá lezada tolok nia avó. Wainhira tribunal konfirma fali ho lezada relasiona ho faktu sira ne'e, lezada haktuir katak arguida baku nia tanbá nia tolok nia avó.

Iha alegasaun finál, ministériu públiku konsidera faktu hotu-hotu provadu tuir konfisaun arguida nian no konfirmasaun lezada, nune'e husu ba tribunál atu kondena arguida ho pena multa US\$45.00.

Defeza argumenta katak arguida konfesa, arepende ba nia hahalok, responsavel ba lezada no kondisaun ekonomia lezada nian ne'ebé la favorese atu aplika pena multa, tanba ne'e husu ba tribunál atu aplika pena admoestasaun.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 18 Jullu 2014 iha tuku 14:00 lokraik.

5. Krime ofensa ba integridade física simples ho natureza violência doméstica - Nú. Prosesu: 423/14. TDDIL

Kompozisaun Tribunál	: Juis singular
Juis	: Dra. Jumiaty Freitas
Ministériu Públiku	: Dra. Gloria Alves
Defeza	: Dr. Rui Manuel Guterres (defensoria pública)
Konkluzau	: Kondena ho pena prizaun fulan 6 suspende ba tinan 1

Iha 7 Jullu 2014, Tribunál Distritál Dili julga arguidu AM ne'ebé komete krime violência doméstica hasoru nia feen, iha Distritu Dili.

Ministériu públiku akuza katak iha 12 Abril 2011, arguidu tuku dala ida iha lezada nia hasan no dala ida iha kotuk laran. Aktu ne'e rezulta lezada sofre moras iha hasan no kotuk laran. Kazu ne'e tanba deit lezada haruka arguidu tula lezada ninia inan ba iha Bidau, maibe arguidu lakohi tanba ne'e mak sira diskuti malu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violência Doméstica.

Iha tribunál, arguidu konfesa integralmente faktus husi akuzasaun, arepende ba nia hahalok no deklara katak liu tiha lora 3 sira diak malu fali. Tanba arguidu konfesa tribunál decide la presija rona tan lezada nia depoimentu no kontinua ba alegasaun finál.

Iha alegsaun finál, ministériu públiku konsidera faktus hotu-hotu provadu tuir konfisaun arguidu nian. Mesmu nune'e, tanba arguidu arepende nia hahalok no diak malu ona ho lezada, husu ba tribunál atu kondena arguidu ho pena suspensaun.

Defeza husu ba tribunál atu fo pena ne'ebé kaman tanba arguidu kolabora diak ho tribunál hodi deskobre lialos, arepende nia hahalok, diak malu ona ho lezada no responsabiliza ba nia familia.

Kazu ne'e konklui iha 17 Jullu 2014, no depoisde avalia faktus provadus sira ne'ebé produz durante julgamentu, tribunál kondena arguidu ho pena prizaun fulan 6 suspende ba tinan 1.

6. Krime ofensa ba integridade física simples ho natureza violência doméstica-Nú. Prosesu: 455/14. TDDIL

Kompozisaun Tribunál : Juis singular
Juis : Dra. Zulmira da Silva
Ministériu Públiku : Dr. José Elo
Defeza : Dra. Marcia Sarmiento (defensória pública)
Konkluzau : Sei kontinua prosesu

Iha 10 Jullu 2014, Tribunál Distritál Dili julga arguidu MJM ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 4 Maiu 2013, arguidu foti ai-sanak ida baku iha lezada nia kabas, no kauza lezada sofre moras. Tanba trauma arguidu nia hahalok ne`e, lezada lori nia oan halai ba iha Liquisa, iha 6 Maiu 2013, arguidu tuir ba Liquisa tuku dala rua iha lezada nia kabas no buti lezada nia kakorok nune`e rezulta bubu no moras. Kazu ne`e akontese tanba lezada la tein hahan meudia nian.

Ministériu Públiku akuza arguidu kontra artigu 145 Kódigu Penál kona ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus sira iha akuzasaun, deklara katak nia arepende ninia hahalok no diak malu ona ho lezada. Lezada depoimenta katak arguidu halo duni aktu refere , durante sira moris hamutuk sempre mosu problema no arguidu sempre baku hela deit lezada.

Iha alegasaun finál, ministériu públiku husu ba tribunál atu halo alterasaun kualifikasaun juridiku husi artigu 145 Kódigu Penál konabá krime ofensa ba integridade fízika simples ba fali artigu 154 Kódigu Penál kona-ba krime maus tratus ba kónjuje. Tuir ministériu públiku kazu ne`e priense elementu krime maus tratus ba kónjuje.

Defeza husu ba tribunál atu kontinua mantein ho krime ofensa ba integridade fízikas simples ho natureza violénsia doméstika ne`ebé akuza ona, tanba kazu ne`e la priense elementu husi krime maus tratus ba kónjuje. Bazeia ba faktu sira ne`e, husu ba tribunál atu aplika pena ne`ebé justu.

Depoisde rona tiha alegasaun hosi parte sira, tribunál marka fali agenda julgamentu ba leitura sentensa iha 23 Jullu 2014, iha tuku 14:30.

7. Krime ofensa ba integridade fízika simples ho natureza violénsia doméstika-Nú. Prosesu: 303/14. TDDIL

Kompozisaun Tribunál : Juis singular
Juis : Dra. Francisca da Silva
Ministériu Públiku : Dr. Renato Bere Nahak
Defeza : Dra. Marcia Sarmiento (defensória pública)
Konkluzau : Sei kontinua prosesu

Iha 10 Jullu 2014, Tribunál Distritál Dili julga arguidu DS ne'ebé komete krime violénsia doméstika hasoru nia feen, iha Distritu Dili.

Ministériu públiku akuza katak iha 28 Juñu 2013, arguidu diskuti malu ho lezada no aperta lezada nia kakorok no dudu ba parede. Aktu ne'e rezulta lezada sofre moras iha lezada ninia kakorok.

Ministériu Públiku akuza arguidu kontra artigu 145 Kódigu Penál kona-bá krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu deklara katak nia buti duni lezada nia kakorok tanbá lezada deskonfia arguidu ba feto seluk, arguidu arepende ba nia hahalok no diak malu ona ho lezada. Tanbá arguidu konfesa faktus hotu husi akuzasaun, tribunál decide kontinua ba alegasaun.

Iha alegasaun finál, ministériu públiku husu ba tribunál atu aplika suspensaun ba pena prizaun tanbá arguidu konfesa arepende ba nia hahalok no diak malu ona ho lezada.

Defeza iha nia konkluzau husu ba tribunál atu fo justisa tanbá arguidu kolabora diak ho tribunál hodi deskobre lialoos.

Depoizde rona tiha alegasaun husi parte sira, tribunál marka fali julgamentu ba leitura sentensa iha 25 Jullu 2014 iha tuku 16:00.

8. Krime ofensa ba integridade fízika simples iha natureza violénsia doméstika-Nú. Prosesu: 206/14. TDDIL

Kompozisaun Tribunál : Tribunál singular
Juis : Dra. Jacinta Correia da Silva
Ministériu Públiku : Dr. Felismino Cardoso
Defeza : Dr. Manuel Sarmento (defensória pública)
Konkluzau : Omologa

Iha 11 Jullu 2014, Tribunál Distritál Dili julga arguidu MCA ne'ebé komete krime violénsia doméstika hasoru nia feen, iha Distritu Dili.

Ministériu públiku akuza katak iha data ne'ebé la apuradu maibé antes fulan Jullu 2010, arguidu basa lezada nia hasan dala rua no lari sumbriña baku dala barak iha lezada nia isin lolon. Aktu ne'e rezulta lezada sofre moras iha nia hasan no isin lolon. Kazu ne'e akontese tanbá arguidu deskonfia lezada ba mane seluk.

Ministériu públiku akuza arguidu kontra artigu 145 Kódigu Penál kona-bá krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu rekuza akuzasaun husi ministériu públiku katak faktus husi akuzasaun ne'ebé ministériu públiku akuza ba nia ne'e la loos. Arguidu deklar katak uluk akontese duni problema entre arguidu ho lezada maibé problema refere tribunál fo ona desizaun.

Iha parte seluk, lezada kontinua reforsa faktu sira iha akuzasaun ministériu públiku no deklar mós katak kazu ne'ebé hetan ona desizaun ne'e akontese iha 2011, no kazu ne'ebé julga dadauk ne'e akontese iha 2010.

Iha alegasaun finál, ministériu públiku husu ba tribunál atu aplika pena multa. Entertantu defeza iha nia konkluzaun husu ba tribunál atu kondena arguidu ho pena admoestasaun.

Iha 21 Jullu 2014, tribunál prejide leitura sentensa hodi halo alterasaun kualifikasaun juridiku husi artigu 145 Kodigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika ba fali ofensa ba integridade fízika simples baibain tanbá kazu ne'e akontese iha momentu Lei Kontra Violénsia Doméstika seidauk tama no vigor.

Depoisde halo alterasaun, tribunál halo tentativa konsiliaun no omologa akordu dame ne'ebé lezada no arguidu halo.

9. Krime violasaun seksuál - Nú. Prosesu: 362/TDDIL/2014

Kompozisaun Tribunál	: Juis kolektivu
Juis	: Dra. Jacinta Correia da Costa (reprezenta juis kolektivu)
Ministériu Públiku	: Dr. Matias Soares
Defeza	: Dr. Rui Manuel Guterres (defensória públiku)
Konkluzaun	: Absolve

Iha 11 Jullu 2014, Tribunál Distritál Dili julga arguidu MSX ne'ebé komete krime violásaun seksuál hasoru IM, iha Distritu Dili.

Ministériu Públiku akuza katak iha 17 Jullu 2013, lezada hein kareta atu ba eskola, arguidu ho taxi para iha lezada nia oin no tula lezada atu ba eskola São Miguel. To'o iha eskola São Miguel nian tanbá portaun eskola nian taka ona, arguidu lori fali lezada ba parte hotel Timor Lodge nia sorin. Arguidu para tiha taxi obriga no ameara lezada hodi halo relasaun seksuál.

Ministériu Públiku akuza arguidu kontra artigu 171 kona-ba krime koasaun seksuál konjuga ho artigu 172 Kódigu Penál kona-ba krime violásaun seksuál.

Iha tribunál, arguidu deklar katak halo relasaun seksuál ho lezada tanbá hakarak malu la'ós obriga. Arguidu konfesa katak para taxi iha dirasaun hotel Timor Lodge nian, tanba arguidu ba soe bee maibé lezada tur hein arguidu iha taxi laran.

Arguidu konfesa liu tan katak relasaun seksuál ne'ebé nia halo ho lezada ne'e hamutuk dala lima ona, iha taxi laran dala tolu, maibé lezada rasik la halo reasaun ruma kontra arguidu. Arguidu mós deklar tan katak antes akontesementu ne'e, arguidu no lezada mós halo ona relasaun seksuál dala rua iha hotel.

Bazeia ba faktu sira ne'e, tribunál konklui katak lezada iha tinan 17 no tribunál rasik duvida ba akuzasaun ministériu públiku. Aleinde ne'e, tribunál hanoin katak lezada la aproveita atu halai ses husi arguidu iha momentu arguidu para tiha taxi no ba soe bee iha zona Timor Lodge nian. Lezada rasik mós la hakilar wainhira arguidu obriga lezada halo relasaun seksuál.

Tribunal mós konsidera katak arguidu ho lezada halo relasaun seksuál to'o dala tolu iha taxi laran maibé lezada la halo reasaun ruma kontra arguidu. Tribunál mós duvida tanba lezada hetan isin rua maibé subar ba nia inan-aman no arguidu, liu tiha fulan hitu mak lezada fo hatene ba nia inan-aman katak nia hetan isin rua husi arguidu.

Tanbá tribunál duvida ba faktus sira husi akuzasaun, tribunál bazeia ba prinsipiu "*in dubio pro reo*" (prinsipiu ne'ebé haktuir katak, kuandu faktus ruma ne'ebé hamosu duvida ba tribunál, tribunál tenke fo desizaun ne'ebé favorese liu ba arguidu).

Bazeia ba faktus ne'ebé produs iha julgamentu no liga ho prinsipiu ne'e, tribunál decide hodi absolve arguidu.

10. Krime ofensa ba integridade fízika simples ho natureza violénsia doméstika - Nú. Prosesu: 479/14. TDDIL

Kompozisaun Tribunál : Juis singular
Juis : Dra. Jumiati da Silva
Ministériu Públiku : Dr. Jacinto Babo
Defeza : Dra. Marcia Sarmiento (defensória pública)
Konkluzau : Kondena ho pena multa

Iha 21 Julu 2014, Tribunál Distritál Dili prejide leitura sentensa no kondena arguidu LFA ne'ebé komete krime violénsia doméstika hasoru nia feen, iha Distritu Dili.

Ministériu públiku akuza katak iha 21 Setembru 2013, arguidu tebe dala rua iha kelen, tuku dala ida iha kotuk laran. Tuir mai, iha 2 Outobru 2013, arguidu tuku tan dala ida iha lezada nia kotuk laran. Aktu ne'e rezulta lezada sofre moras iha kelen, kotuk laran no kabas. Kazu ne'e akontese tanbá lezada deskonfia arguidu ba feto seluk.

Ministériu Públiku akuza arguidu kontra artigu 145 Kódigu Penál konabá ofensa ba integridade fízika simples konjuga ho artigu 35 Lei Kontra Violénsia Doméstika.

Depoide avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$90.00. Tribunal mós fiksa pena alternativa loron 60 prizaun kuandu arguidu la kumpri pena multa ne'e, kondena mós kustas judisiariu US\$10.

11. Krime ofensa ba integridade fízika simples ho natureza violénsia doméstika - Nú. Prosesu: 441/14. TDDIL

Kompozisaun Tribunál : Juis singular

Juis : Dra. Jumiati da Silva
Ministériu Públiku : Dra. Ivonia Guterres
Defeza : Dr. Cancio Xavier (defensória pública)
Konkluzau : Kondena ho pena multa

Iha 21 Jullu 2014, Tribunál Distritál Dili prejide leitura sentensa no kondena arguidu JVA ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 2 Novembru 2013, arguidu tuir lezada ba iha lezada nia servisu fatin, tuku dala 3 iha lezada nia ibun. Aktu ne`e kauza kanek no ran sai. Kazu ne`e akontese tanba arguidu deskonfia lezada namora ho mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Tribunál deskobre katak arguidu provadu tuku lezada nia ibun nune`e kauza kanek no ran sai. Bazeia ba faktus provadus hirak ne`e, tribunál konsidera sirkunstansia hotu-hotu hosi kazu ne`e no kondena arguidu ho pena multa US\$45. Tribunál mós fiksa pena alternativa loron 40 prizaun kuandu arguidu la kumpri pena multa ne`e.

12. Krime ofensa ba integridade física simples ho natureza violénsia doméstika-Nú. Prosesu: 35/2014.TDDIL

Kompozisaun Tribunál : Juis singular
Juis : Dr. Julio Gantes
Ministériu Públiku : Dr. Jacinto Babo
Defeza : Dr. Sergio Paulo Dias Quintas (defensória pública)
Konkluzau : Kondena arguidu ho pena prizaun tinan 1 suspende ba tinan 3

Iha 18 Jullu 2014, Tribunál Distritál Dili julga arguidu AA ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 11 Outobru 2012, arguidu basa lezada nia hasan, tuku dala barak iha isin lolon no tebe iha hirus matan.

Iha 24 Outobru 2014, arguidu lori katana ta`a lezada nia liman, nune`e rezulta kanek no ran iha lezada nia liman. Kazu ne`e akontese tanba arguidu deskonfia lezada ba mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 3 no 35 Lei Kontra Violénsia Doméstika.

Iha audensia julgamentu ne`e hala`o sein prezensa arguidu nian tanba arguidu ba ona Irlandia depoisde akontesementu. Iha deklarasaun lezada nian reforsa akuzasaun ministériu públiku katak arguidu komete duni krime ne`e hasoru lezada.

Depoisaun produsaun ba prova, tribunál halo avaliasaun ba faktus no altera akuzasaun husi krime ofensa ba integridade física simples iha artigu 145 Kódigu Penál ba krime maus tratus ba kónjuje tuir artigu 154 Kódigu Penál tuir artigu 274 Kódigu Prosesu Penál, kona-ba kualifikasaun juridiku.

Iha alegasaun finál, ministériu públiku konsidera faktus hotu-hotu provadu bazeia ba konfirmasaun husi lezada, nune`e husu ba tribunál atu aplika pena ne`ebé adekuaudu ba arguidu. Entertantu defeza husu ba tribunál atu aplika pena ne`ebé apropiadu.

Depoisaun avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ba krime primeiru ho pena prizaun fulan 9 no kazu segundu ho pena prizaun fulan 6. Kumulasaun ba krime rua ne`e tribunál aplika pena únika tinan 1 no suspende ba tinan 3.

13. Krime ofensa ba integridade física simples ho natureza violénsia doméstika-Nú Prosesu: 336/2014/TDD

Kompozisaun : Juis singular
Juis : Dra. Jumiaty Freitas
Ministériu Públiku : Dr. Felismino Cardoso
Defeza : Dr. Manuel Lito Exposto (defensória públiku)
Konkluzau : Kondena arguidu ho pena prizaun fulan 6 suspende ba tinan 1

Iha 3 Jullu 2014, Tribunál Distritál Dili julga arguidu JDS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak, iha 6 Juñu 2013, arguidu basa dala rua iha lezada nia hasan karuk no tuku dala rua iha kotuk laran. Kazu ne`e akontese tanba arguidu ho lezada diskuti malu kona-ba arguidu atu sunu lezada nia dokumentu importante sira.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples kónjuga ho artigu 1, 2, 3 no 35 Lei Kontra Violénsia Doméstika.

Iha tribunál, arguidu konfesa totálmente faktus sira ne`ebé hakerek iha akuzasaun, arepende nia hahalok no deklara katak sei la repete tan iha futuru.

Iha alegasaun finál, ministériu públiku husu ba tribunál atu kondena arguidu ho pena prizaun fulan 6 suspende ba tinan 1 tanbá arguidu konfesa faktus sira ne`ebe akuza ba nia, arepende nia hahalok no diak malu ona ho lezada.

Defeza husu fo pena ne`ebé labele limita arguidu nia liberdade, tanbá arguidu kolabora hodi deskobre lialos, arepende nia hahalok, di`ak malu ho lezada no responsabiliza ba familia.

Depoisaun avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 6 suspende ba tinan 1, selu mós kusta judicial US\$10.

**14. Krime ofensa ba integridade fizika simples ho natureza violénsia doméstika-Nú
Prosesu: 380/2014/TDD**

Kompozisaun tribunál : Juis singular
Juis : Dra. Jumiaty Freitas
Ministériu Públiku : Dr. José Elu
Defeza : Dr. Rui Guterres (defensória públiku)
Konkluzau : Kondena arguidu ho pena prizaun fulan 6 suspende ba tinan 1

Iha 3 Jullu 2014, Tribunál Distritál Dili julga arguidu BdA ne`ebé komete krime violénsia doméstika hasoru nia oan, iha Distritu Dili.

Ministériu Públiku akuza katak iha 13 Maiu 2013, lezadu lori aisanak baku nia alin to'o nia alin tanis. Tanba ne'e, arguidu nervoju lori ai tuda lezadu nia kotuk laran. Lezadu monu ba rai no arguidu kontinua baku lezadu to'o nia inus ran.

Ministériu Públiku akuza arguidu kontra artigu 145 Kódigu Penál kona- ba ofensa ba integridade fizika simples kónjuga ho artigu 1, 2, 3 no 35 Lei Kontra Violénsia Doméstika.

Iha tribunál, arguidu konfesa totálmente faktus sira iha akuzasaun, arepende nia hahalok no deklarata katak sei la repete hahalok hanesan hasoru lezadu iha futuru.

Iha alegasaun finál, ministériu públiku husu ba tribunál atu kondena arguidu ho pena prizaun fulan 6 suspende ba tinan 1 tanbá arguidu konfesa faktus, arepende nia hahalok no diak malu ona ho lezada.

Defeza husu ba tribunál atu fo pena ne'ebé la-bele limita arguidu nia liberdade, tanbá arguidu kolabora hodi deskobre lialoos, arepende nia hahalok, di'ak malu ho lezada, no responsabiliza ba familia.

Depoizde avalia faktus provadus sira ne`ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1, plus selu mós kusta judisiál US\$10.

**15. Krime ofensa ba integridade fizika simples ho natureza violénsia doméstika- Nú.
Prosesu: 372/2013/TDD**

Kompozisaun tribunál : Juis singular
Juis : Dra. Jacinta Correia da Costa
Ministériu Públiku : Dr. Jasinto babo
Defeza : Dr. Sergio Quintas (defensória públika)
Konkluzau : Kondena ho pena prizaun fulan 6 suspende ba tinan 1

Iha 8 Jullu 2014, Tribunál Distritál Dili julga arguidu NVM ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 3 Jullu 2012, arguidu ho lezada diskuti malu. Tanba ne`e, arguidu basa dala haat iha lezada nia hasan karuk no tuku lezada dala rua iha kotuk laran. Kazu ne`e akontese tanba lezada diskunfia arguidu iha relasaun ho feto seluk.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 2 no 3 Lei Kontra Violénsia Doméstika.

Iha tribunál, arguidu konfesa totalmente faktus sira ne`ebé deskreve iha akuzasaun. Tanba ne`e, tribunál husu ba ministériu públiku no defeza atu la presiza rona lezada tan lezada nia depoimentu.

Iha alegasaun finál, ministériu públiku haktuir katak tanba arguidu konfesa no arepende ba nia hahalok, husu ba tribunál aplika pena multa.

Defeza argumenta katak arguidu konfesa no arepende ba nia hahalok no tanba ne`e husu ba tribunál aplika pena adekuada.

Depois avalia faktus provadus ne`ebé produz durante julgamentu tribunál konklui prosesu ne`e no kondena arguidu ho pena prizaun fulan 6 suspende ba tinan 1.

16. Krime ofensa ba integridade fízika simples ho natureza violénsia doméstika- Nú. Prosesu: 402/2014/TDD

Kompozisaun tribunál : Juis singular
Juis : Dr. Duarte Tilman Soares
Ministériu Públiku : Dr. Renato Bere Nahak
Defeza : Dr. Fernando Lopes (defensória pública)
Konkluzau : Kondena ho pena prizaun fulan 6 suspende ba tinan 1

Iha 8 Jullu 2014, Tribunál Distritál Dili julga arguidu EdSF ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 4 Outobru 2012, arguidu lori besi baku lezada nia oin to'o kanek. Kazu ne`e akontese tanba arguidu telefone lezada dala barak maibe lezada la atende telefone.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2 no 3 Lei Kontra Violénsia Doméstika.

Iha tribunál, arguidu daklara katak faktus iha akuzasaun ne`e balu loos no balu la loos. Faktus ne`ebé la loos mak arguidu la uja besi baku lezada nia oin maibe baku deit kareta nia vidru to'o rahun no basa deit lezada dala rua.

Iha alegasaun finál, ministériu públiku konfirma katak, tanba arguidu konfesa no arepende ba nia hahalok, nune'e husu ba tribunál atu kondena arguidu tuir krime ne'ebé nia komete. Defeza mós argumenta katak arguidu konfesa no arepende ba nia hahalok, tanba ne'e husu ba tribunál aplika pena adekuada.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

**17. Krime ofensa ba integridade fizika simples ho natureza violénsia doméstika-Nú
Prosesu: 224/2014/TDD**

Kompozisaun tribunál : Juis singular
Juis : Dra. Fransisca Cabral
Ministériu Públiku : Dra.Ivonia Guterres
Defeza : Dr. José da Silva (defensória pública)
Konkluzau : Kondena arguidu ho pena prizaun fulan 6 suspende ba tinan 1

Iha 9 Jullu 2014, Tribunál Distritál Dili julga arguidu NG ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 16 Dezembru 2013, arguidu buti lezada nia kakorok no dudu lezada to'o monu ba rai. Kazu ne'e akontese tanba deit lezada husu osan atu sosa labarik nia susuben.

Ministériu Públiku akuza arguidu kontra artigu 145 Kódigu Penál kona-bá ofensa ba integridade fízika simples konjuga ho artigu 2 no 3 Lei Kontra Violénsia Doméstika.

Iha alegasaun finál, ministériu públiku konfirma katak tanba arguidu konfesa no arepende ba nia hahalok, tanba ne'e husu ba tribunál atu aplika pena tuir krime ne'ebé arguidu komete. Defeza argumenta katak arguidu konfesa no arepende nia hahalok, tanba ne'e husu ba tribunál aplika pena ne'ebé labele limita arguidu nia liberdade.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

**18. Krime ofensa ba integridade fízika simples ho natureza violénsia doméstika - Nú.
Prosesu: 455/14/TDDIL**

Kompozisaun tribunál : Juis singular
Juis : Dra. Zulmira da Silva
Ministériu Públiku : Dr. José Elo
Defeza : Dra. Marcia Sarmiento (defensória pública) substitui Dr. Ruben de Carvalho advogadu estajáriu.
Konkluzau : Sei kontinua prosesu

Iha 24 Jullu 2014, Tribunál Distritál Dili prejide audiénsia julgamentu no anula leitura sentensa hodi halo alterasaun ba kualifikasaun juridika husi krime ofensa ba integridade fízika simples ba krime maus tratus ba kónjuje. Depois altera tiha kazu ne'e tribunál husu organiza julgamentu foun.

Antes ne'e, ministériu públiku akuza katak iha 4 Maiu 2013, arguidu lori ai-pedasuk baku dala rua iha lezada nia kabas, baku dala haat iha kotuk laran tanba lezada la tein. Tuir mai, iha 6 Maiu 2013, arguidu buti iha lezada nia kakorok no tuku iha lezada nia kabas dala rua.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuja ho artigu 3 no 35 Lei Kontra Violénsia Doméstika.

Iha tribunál, arguidu deklara katak kazu primeíriu akontese primeíru iha Comoro, arguidu basa dala ida iha hasan tanba lezada tuda uluk arguidu. Kazu segundu akontese iha Liquisa, maibe arguidu deklara katak nia la tuku no buti lezada, arguidu rekonese katak nia basa dala ida ho intensaun atu hanorin.

Enkuantu lezada depoimenta katak arguidu baku nia kabas dala rua no kauza nia kabas metan no tebe dala rua iha kotuk laran. Iha akontesimentu segundu, arguidu buti lezada nia kakorok no tuku iha kabas.

Ministériu Públiku argumenta katak produsaun ba prova iha indisius sufisiente atu halo alterasaun ba krime maus tratus ba kónjuje. Maske nune'e, defeza hatoo nia objesaun no haktuir katak labele altera tanba kazu anterior tama ona trazitu iha julgadu, tanba ne'e labele hatodan arguidu.

Iha alegasaun finál ministériu públiku husu kondena arguidu fulan 6 suspende ba tinan 1 fulan 6. Defeza husu ba tribunál atu konsidera sirkunstánsia atenuante husi arguidu no husu ba tribunál fo pena ne'ebé justu.

Depois avalia faktus ne'ebé produs iha 10 Jullu 2014, tribunál halo alterasaun husi artigu 145 Kódigu Penál kona-ba ofensa ba integridade fízika simples ba artigu 154 Kódigu Penál kona-ba maus tratus ba kónjuje.

Bazeia ba prosesu alterasaun ne'e, tribunál deklara katak anula leitura sentensa hodi hein tribunál hasai notifikasaun foun ba arguidu hodi hala'o julgamentu ho kompozisaun juis koletivu.

19. Krime ofensa ba integridade fízika simples ho natureza violénsia doméstika-Nú. Prosesu:166/2014/TDDIL.

Kopozisaun tribunál : Juis singular
Juis : Dra. Jacinta Correia da Costa
Ministériu Públiku : Dr. Matias Soares
Defeza Públiku : Dr. Rui Manuel Guterres (defensória pública)
Konkluzasaun : Sei kontinua prosesu

Iha 10 Jullu 2014, Tribunál Distritál Dili julga arguida SOC ne`ebé komete krime violénsia doméstika hasoru nia laen, iha Distritu Dili.

Ministériu Públiku akuza katak iha 10 Maiu 2013, arguida foti tudik iha meja leten tuda kona iha lezadu nia liman parte loos no rezulta lezadu nia liman nakles. Aleinde ne`e arguida mós sona tan iha lezada nia liman kabun. Aktu ne`e kauza lezadu tenke ba halo tratamentu iha Óspital Guidu Valadares. Kazu ne`e akontese tanba sira haksasuk malu kona-ba abortu no lezadu iha fetu seluk.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples, konjuga ho artigu 3 no 35 alinea (b) Lei Kontra Violénsia Doméstika.

Iha audiénsia julgamentu arguida deklarara ba tribunál katak faktus balu loos no balu laloos. Faktus ne`ebé laloos mak hanesan data no sona lezadu ne`e laloos. Maibé arguida rekonese katak nia lori tudik tuda lezadu ne`e loos. Iha parte seluk lezadu deklarara katak ba faktus sira iha akuzasaun ne`e loos hotu.

Iha alegasaun final, ministériu públiku haktuir katak arguida nega faktus balu katak la`os sona maibé tuda deit ho tudik. Aktu ne`e priense duni kriteria tuir artigu 145 Kódigu Penál. Tanba ne`e husu ba tribunál atu kondena arguida ho pena multa US\$ 90.

Defeza konsidera katak iha diferensia faktus entre parte rua, arguida arepende nia hahalok, no foin primeiraves komete krime, husu ba tribunál atu aplika pena admoestasaun ba arguida.

Depoisde rona tiha alegasaun husi parte sira, tribunál marka fali julgamentu ba leitura sentensa iha 22 Jullu 2014, iha tuku 17.00 loraik.

20. Krime ofensa ba integridade fizika simples ho natureza violénsia doméstika- Nú. Prosesu: 322/2014/TDDIL

Kopozisaun tribunál	: Juis singular
Juis	: Dra. Fransisca Martins
Ministériu Públiku	: Dra. Ivonia Maria Guterres
Defeza	: Dra. Marcia Sarmiento (defensória públiku)
Konkluzasaun	: Sei kontinua prosesu

Iha 10 Jullu 2014, Tribunál Distritál Dili julga arguidu FdC ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 22 Janeiru 2013, arguidu tuku dala rua iha lezada nia matan fukun karuk no kauza too hetan bubu. Kazu ne`e akontese tanba wainhira arguidu atu ba servisu hare sira nia oan han hela aimanas no arguidu hirus maibe lezada hateten katak labele hirus labarik.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples, konjuga ho artigu 3 no 35 Lei Kontra Violénsia Doméstika.

Iha tribunál arguidu konfesa totalmente ba faktus hotu iha akuzasaun. Hare ba faktus hotu provadus tribunál presinde atu la rona deklarasaun husi lezada.

Iha alegasaun finál, ministériu públiku konsidera katak faktus hotu provadu, nune'e husu ba tribunál atu aplika pena prizaun fulan 6 suspende ba tinan 1. Iha parte seluk defeza hano'in katak arguidu foin primeiraves komete krime no arepende nia hahalok, nune'e husu ba tribunál atu aplika pena ne'ebé justu.

Depoizde rona tiha alegasaun husi parte sira, tribunál marka fali agenda julgamentu ba leitura sentensa iha 25 Jullu 2014 iha tuku 16.00 Lokraik.

21. Krime ofensa ba integridade física simples ho natureza violência doméstica - Nú. Prosesu : 66/2014/TDDIL

Kompozisaun tribunál : Juis singular
Juis : Dra. Fransisca Martins
Ministériu Públiku : Dr. Mateus Soares
Defeza : Dr. Cancio Xavier (defensória públiku)
Konkluzau : Absolve

Iha loron 11 Jullu 2014, Tribunál Distritál Dili prejide leitura sentensa ba kazu violência doméstica ne'ebé involve arguida SMSS hasoru nia oan, iha Distritu Dili.

Ministériu Públiku akuza katak maisumenus iha fulan Setembru 2013, arguida baku lezadu nia ulun, ain no tuku dala 3 iha kotuk laran. Kazu ne'e akontese tanba lezadu halo nia alin monu wainhira ba halimar bisikleta iha estrada.

Ministériu Públiku akuza arguida kontra artigu 145 Kódigu Penál kona-ba ofensa ba integridadefísica simples konjuga ho artigu 35 Lei Kontra Violência Doméstica.

Iha tribunál, arguida konfesa totalmente ba faktus hotu ne'ebé mak konsta iha akuzasaun. Arguida mós deklara ba tribunál katak nia la iha intensaun atu halo kanek maibe atu hanorin deit.

Iha alegasaun finál, ministériu públiku husu ba tribunál atu kondena arguidu ho pena admoestasaun. Enkuantu defeza husu ba tribunál atu bele absolve arguida.

Depoizde avalia faktus provadus sira ne'ebé produz durante julgamentu, tribunál konklui prosesu ne'e hodi absolve arguida.

22. Krime ofensa ba integridade física simples ho natureza violência doméstica- Nú. Prosesu: 172/2014/TDD.

Kompozisaun tribunál : Juis singular
Juis : Dr. Julio Gantes
Ministériu Públiku : Dr. Jose Ello

Defeza : Dr. Fernando de Carvalho (defensória pública)
Konkluzasaun : Kondena ho pena multa

Iha 10 Jullu 2014, Tribunál Distritál Dili prezide julgamentu leitura sentensa ba kazu violénsia doméstika ne'ebé komete husi arguidu ES hasoru nia feen, iha Distritu Dili.

Ministériu Públiku akuza katak iha 17 Setembru 2011, arguidu tuku dala ida iha hasan no tebe dala rua iha kidun. Kazu ne'e akontese tanba lezada diskunfia arguidu ho fetu seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 3 no 35 alinea b Lei Kontra Violénsia Doméstika.

Iha tribunál arguidu konfesa faktus sira iha akuzasaun, arepente nia hahalok no deklara katak sei la repete krime hanesan iha futuru.

Iha alegasaun finál, ministériu públiku konsidera katak arguidu konfesa totalmente husu ba tribunál atu aplika pena multa US \$ 90 no selu kusta judisiáriu US\$ 10. Iha parte seluk defeza konsidera katak arguidu konfesa faktus hotu, husu ba tribunál atu aplika pena suspensaun ba arguidu.

Depoide avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$90 no selu kustas judisiáriu US\$10. Tribunál mós fiksa pena alternativa loron 60 prizaun kuandu arguidu la kumpri pena multa ne'e.

23. Krime ofensa ba integridade fizika simples ho natureza violénsia doméstika Nú. Prosesu: 426/2014/TDD

Kompozisaun tribunál : Juis singular
Juis : Dra. Zulmira da Silva
Ministériu Públiku : Dr. Hipolito Santa
Defeza : Dra. Olga Barreto (defensória pública)
Konkluzasaun : Kondena arguidu ho pena prizaun fulan 3 suspende ba tinan 2.

Iha 09 Jullu 2014, Tribunál Distritál Dili prezide leitura sentensa ba kazu violénsia doméstika ne'ebé komete husi arguidu AFC hasoru nia feen, iha Distritu Dili.

Ministériu Públiku akuza katak iha 15 Marsu 2012, arguidu tuku iha lezada nia matan fukun karuk no kauza lezada hetan bubu iha nia mata fukun. Kazu ne'e akontese tanba arguidu ho lezada diskuti malu kona-bá sms hosi nomor foun ba lezada nia telefone ne'ebe dehan katak "*keta book hau nia laen*".

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples.

Iha audiénsia julgamentu arguidu deklara ba tribunál katak nia la tuku lezada. Wainhira tribunál konfirma ba lezada no lezada deklara katak arguidu tuku dala ida no basa dala rua no kauza nia hetan bubu.

Iha alegasaun finál, ministériu públiku hare katak maske arguidu nega faktus hotu katak nia la tuku maibé ministériu públiku mantein nafatin faktus ne'ebé mak konsta iha akuzasaun no husu ba tribunál atu aplika pena suspensaun ba arguidu.

Iha parte seluk defeza hanoin katak deklarasaun ne'ebé mak lezada hato'o iha audiénsia julgamentu ho faktus ne'ebé mak konsta iha akuzasaun iha diferensa, nune'e husu ba tribunál atu aplika pena ne'ebé justu ba arguidu.

Depoizde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 2.

24. Krime ofensa ba integridade física simples ho natureza violência doméstica - Nú. Prosesu: 194/2013/TDD.

Kompozisaun tribunál	: Juis singular
Juis	: Dr. Fransisca da Silva
Ministériu Públiku	: Dr. Mateus Nessi
Defeza	: Dr. Fernando de Cabral (defensória públiku)
Konkluzasaun	: Sei kontinua prosesu

Iha 09 Jullu 2014, Tribunál Distritál Dili julga kazu violência doméstica ne'ebé komete husi arguidu NMQ hasoru nia feen, iha Distritu Dili.

Ministériu Públiku akuza katak iha 07 Fevereiru 2012, arguidu basa dala hat iha lezada nia hasan sorin karuk no loos, tebe dala rua iha kidun no tuku dala rua iha kotuk laran. Kazu ne'e akontese tanba arguidu haruka lezada hamos modo atu tein ba ema han hodi halo uma, maibé lezada soe hela modo no lori labarik sira ba tuir tia misa.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 3 no 35 Lei Kontra Violénsia Doméstika.

Iha tribunál, arguidu konfesa faktus iha akuzasaun, arepende nia hahalok no deklara katak sei la repete krime hasoru lezada iha futuro. Tribunál konfirma faktu sira ne'e ho lezada no lezada deklara katak arguidu komete duni aktu hirak ne'e hasoru lezada.

Iha alegasaun finál, ministériu públiku konfirma katak faktus hotu provadu, nune'e husu ba tribunál atu kondena arguidu iha artigu 145 Kódigu Penál.

Iha parte seluk defeza husu atu konsidera sirkunstansia atenuante balu hanesan sira diak malu ona no arguidu arepende ona nia hahalok. Bazeia ba sirkunstansia sira ne'e, husu ba tribunál atu aplika pena ne'ebé justu ba arguidu.

Depoisde rona tiha alegasaun hosi parte sira, tribunál marka fali agenda julgamentu ba leitura sentensa iha 25 Jullu 2014 iha tuku 16:00 loraik.

25. Krime ofensa ba integridade física simples ho natureza violência doméstica- Nú. Prosesu: 166/2014/TDDIL.

Kompozisaun tribunál : Juis singular
Juis : Dr. Duarte Tilman
Ministériu Públiku : Dr. Mateus Nessi
Defeza : Dra. Marcia Sarmento (defensória públiku)
Konkluzasaun : Kondena ho pena prizaun fulan 6 suspende ba tinan 1 fulan 6

Iha 30 Jullu 2014, Tribunál Distritál Dili prezide julgamanetu ba kazu violência doméstica ne'ebe involve arguidu JD hasoru nia feen, iha Distritu Dili. Depoisde julgamentu imediatamente tribunál konklui kedas prosesu ne'e.

Ministériu Públiku akuza katak iha 04 Agustu 2010, arguidu lori fiu listrik baku dala tolu iha lezada nia kidun no dudu lezada monu tun ba rai. Aktu hirak ne'e kauza lezada nia liman sikun nakles. Kazu ne'e akontese tanba lezada mak provoka arguidu hodi konta fali historia entre arguidu ho nia eis-namorada.

Ministériu Públiku akuza arguidu kontra artigu 145 Kódigu Penál kona-bá ofensa ba integridade física simples.

Iha tribunál, arguidu konfesa faktus sira iha akuzasaun, arepende nia hahalok no deklara katak sei la repete krime hasoru lezada iha futuro.

Iha alegasaun finál, ministériu públiku alega katak, konsidera faktus hotu-hotu provadu tuir konfisaun arguidu, arependementu hosi arguidu, nune'e husu ba tribunál atu kondena arguidu tuir artigu 145 Kódigu Penál.

Iha parte seluk defeza hanoin katak arguidu foin primeira-ves komete krime, arepende ona nia hahalok, nune'e husu ba tribunál atu aplika pena ne'ebé justu ba arguidu.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun fulan 6 suspende ba tinan 1 fulan 6.

26. Krime ofensa ba integridade física simples ho natureza violência doméstica- Nú. Prosesu: 110/2013/TDDIL.

Kompozisaun tribunál : Juis singular
Juis : Dra. Ana Paula F. M. de Jesus
Ministériu Públiku : Dr. Jose Ello
Defeza : Dr. Ruben de Carvalho (advogado estajiádu)
Konkluzasaun : Absolve

Iha 14 Januari 2011, Tribunál Distritál Dili julga kazu violénsia doméstika ne'ebé komete husi arguidu MDM hasoru nia feen, iha Distritu Dili.

Ministériu Públiku akuza katak iha 04 Agostu 2010, arguidu basa dala ida iha lezada nia hasan loos no lori ai fafulu baku dala ida iha ulun. Kazu ne'e akontese tanba lezada mak provoka arguidu hodi konta fali historia entre arguidu ho nia eis-namorada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples.

Iha audiénsia julgamentu arguidu hili direitu nonok, maibe iha ikus arguidu deklra katak nia arepende hahalok no promote ba tribunál katak sei la komete tan krime hasoru lezada iha futuro.

Iha alegasaun finál, ministériu públiku konsidera katak arguidu hili direitu nonok signifika katak faktus hotu ne'ebé mak konsta iha akuzasaun provadus hotu. Tanba ne'e husu ba tribunál atu aplika pena multa US\$45 no selu kusta judisiáriu US\$10.

Iha parte seluk defeza hakutir katak arguidu foin primeíra-ves komete krime, arguidu arepende ba nia hahalok, nune'e husu ba tribunál atu aplika pena ne'ebé mak justu ba arguidu.

Depoide avalia faktus provadus sira ne'ebé produz durante julgamentu, tribunál mós hare katak lezada la marka prezensa iha audiénsia julgamentu atu konfirma ba faktus sira iha akuzasaun, nune'e tribunál konklui prosesu ne'e hodi absolve arguidu.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPtl